

Broj: 06-03-1040-03/15
Mostar, 18.12.2015. godine

Na osnovu člana 21., člana 22., člana 37., člana 38. i člana 87. stav (3) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13 i 94/15), člana 10, člana 11., člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 8. stav (1), člana 32. stav (4) i člana 45. Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14) i člana 52. Pravilnika za izdavanje dozvola („Službene novine Federacije BiH“ broj 43/14), te na osnovu podnesenog Izvještaja o nadgledanju imaoća dozvole Javnom poduzeću „Elektroprivreda Hrvatske zajednice Herceg Bosne“ dioničko društvo Mostar, Regulatorna komisija za energiju u Federaciji Bosne i Hercegovine – FERK je 18.12.2015. godine na XXIII redovnoj sjednici donijela sljedeće

RJEŠENJE

1. Nalaže se Javnom poduzeću „Elektroprivreda Hrvatske zajednice Herceg Bosne“ dioničko društvo Mostar, imaoću Dozvole za rad - licenca za obavljanje elektroprivredne djelatnosti proizvodnje električne energije broj 06-03-730/31/12 od 18.12.2012. godine, poduzimanje sljedećih mjera, u skladu sa uslovima izdate dozvole po tačkama kako slijedi:

a) Mjerenje električne energije

Tačke 4.5., 4.7.1., 4.7.2. i 4.13.1. Dozvole za rad - licenca za obavljanje elektroprivredne djelatnosti proizvodnje električne energije:

- 1) Hitno uraditi sve potrebne aktivnosti u cilju realizacije konačnog funkcionalnog rješenja centralnog prikupljanja podataka sa mjernih uređaja proizvodnih objekata priključenih na elektroprenosnu mrežu i omogućavanja NOSBiH-u direktnog pristupa istim.
- 2) Do uspostavljanja konačnog funkcionalnog rješenja predviđenog prema planu za 2016. godinu realizovati predloženu prelaznu varijantu prikupljanja podataka putem postojećeg sistema daljinskog očitavanja mjernih mjesta u distributivnoj mreži. Imalac dozvole dužan je izraditi i dostaviti Plan aktivnosti sa dinamikom i krajnjim rokom implementacije prelazne varijante daljinskog očitavanja FERK-u **do 24.12.2015. godine do 12: sati**.
- 3) Do implementacije prelazne varijante prikupljanja podataka iz alineje 2) ove tačke, redovno provoditi aktivnosti definisane prema Operativnom planu realizacije ručnog intervalnog prikupljanja podataka sa mjernih tačaka proizvodnih objekata JP „Elektroprivreda HZ HB“ d.d. Mostar priključenih na mrežu Elektroprenosa BiH.
- 4) Izvještaje o provođenju intervalnog prikupljanja podataka prema Operativnom planu realizacije ručnog intervalnog prikupljanja podataka sa mjernih tačaka proizvodnih objekata JP „Elektroprivreda HZ HB“ d.d. Mostar priključenih na mrežu Elektroprenosa BiH dostavljati FERK-u svakog četvrtka tokom cijelog perioda primjene Operativnog plana. Izvještaj

- treba da sadrži informaciju o izvršenom očitavanju mjernih mjesta i potvrdu NOSBiH-a o prijemu podataka (u excel formatu).
- 5) Po uspostavljanju prelazne varijante prikupljanja podataka iz alineje 2) ove tačke putem postojećeg sistema daljinskog očitavanja mjernih mjesta u distributivnoj mreži dostaviti Izvještaj o uspostavljanju prelazne varijante prikupljanja podataka te Plan i dinamiku realizacije konačnog funkcionalnog rješenja centralnog prikupljanja podataka sa mjernih uređaja proizvodnih objekata priključenih na elektroprenosnu mrežu i omogućavanja NOSBiH-u direktnog pristupa istim.
2. Ovo rješenje je konačno i stupa na snagu danom donošenja, te se objavljuje na oglasnoj tabli i internetskoj stranici FERK-a.

Obrazloženje

Postupajući u skladu sa Zakonom o električnoj energiji (Službene novine Federacije BiH, broj 41/02, 24/05, 38/05 i 83/11), propisanim nadležnostima, FERK je imaoću dozvole Javnom poduzeću „Elektroprivreda Hrvatske zajednice Herceg Bosne” dioničko društvo Mostar Rješenjem broj 06-03-730-22/31/12 od 18.12.2012.godine izdao Dozvolu za rad - licenca za obavljanje elektroprivredne djelatnosti proizvodnje električne energije broj 06-03-730/31/12 u proizvodnim objektima HE „Mostar“, PHE „Čapljina“, HE „Jajce I“, HE „Jajce II“, HE „Rama“ i HE „Peć Mlini“. Period važenja navedene dozvole za rad – licence je do 31.12.2022. godine.

U navedenoj Dozvoli za rad u tački 3.1. propisano je da je imalac dozvole ovlašten obavljati djelatnost proizvodnje električne energije u proizvodnim objektima, HE „Mostar“ (na rijeci Neretva, Grad Mostar) instalisane snage 72 MW i predviđene godišnje proizvodnje 310 GWh, PHE „Čapljina“ (na rijeci Trebišnjica, opština Čapljina) instalisane snage 440 MW i predviđene godišnje proizvodnje 620 GWh, HE „Jajce I“ (na rijeci Vrbas, opština Jajce) instalisane snage 60 MW i predviđene godišnje proizvodnje 233 GWh, HE „Jajce II“ (na rijeci Vrbas, opština Jajce) instalisane snage 30 MW i predviđene godišnje proizvodnje 197 GWh, HE „Rama“ (na rijeci Rama, opština Prozor) instalisane snage 160 MW i predviđene godišnje proizvodnje 710 GWh, HE „Peć Mlini“ (na rijeci Vrlika – Tihaljina, opština Grude) instalisane snage 30,6 MW i predviđene godišnje proizvodnje 82 GWh, čiji su tehničkoenergetski parametri dati u Prilogu 1, Prilogu 2, Prilogu 3, Prilogu 4, Prilogu 5 i Prilogu 6 ove dozvole.

Tačkom 4.5. dozvole za rad propisano je da je imalac dozvole obavezan saradivati sa NOSBiH-om i/ili Elektroprenosom Bosne i Hercegovine a.d. Banja Luka u skladu sa Mrežnim kodeksom i nadležnostima NOSBiH-a i/ili Elektroprenosa Bosne i Hercegovine a.d. Banja Luka. Tačkom 4.7.1. iste dozvole propisano je da je imalac dozvole obavezan osigurati mjerenje na svim mjestima primopredaje električne energije i dostavu podataka na način definisan Mrežnim kodeksom NOSBiH-a ili Mrežnim pravilima distribucije u zavisnosti o naponskom nivou primopredaje električne energije. Dalje, tačkom 4.7.2. dozvole za rad je propisano da svi mjerni uređaji na mjestima primopredaje električne energije moraju zadovoljavati standarde date u Mrežnom kodeksu NOSBiH-a, Mrežnim pravilima distribucije, Opštim uslovima za isporuku električne energije i preporukama proizvođača opreme. Takođe, tačkom 13.1. propisano je da se imalac dozvole obavezuje poštivati i primjenjivati tržišna pravila.

Osim navedenog, tačkom 9. predmetne dozvole propisano je da u okviru svojih nadležnosti FERK vrši nadgledanje ispunjenja uslova iz ove dozvole, te da je u cilju ispunjenja uslova ove dozvole, imalac dozvole je obavezan dostavljati podatke u skladu sa tačkom 4.20 i druge dokumente, podatke i informacije na zahtjev FERK-a koje su FERK-u potrebne u svrhu primjene Zakona o električnoj energiji u FBiH, da bi FERK-u omogućio izvršavanje njegovih nadležnosti u skladu sa Zakonom i pravilima i propisima FERK-a. Takođe, propisano je i da je imalac dozvole obavezan obavijestiti FERK o svakoj povredi uslova dozvole u roku od 10 dana od saznanja da je došlo do povrede. Ovlašteni zaposlenici FERK-a, u skladu sa ovom tačkom, imaju pravo obavljati redovno i vanredno nadgledanje u prostorima imaoca dozvole da bi izvršili uvid u obavljanje elektroprivredne djelatnosti, po obavezama datim u dozvoli, te je imalac dozvole obavezan saradivati sa FERK-om tokom pripreme i prilikom obavljanja nadgledanja.

Tačkom 11. dozvole za rad propisano je to da ukoliko FERK zaključi da imalac dozvole nije ispoštovao ili krši uslove dozvole, poduzima sljedeće aktivnosti: a) opominje imaoca dozvole o evidentiranim nepravilnostima b) podnosi prekršajni nalog c) pokreće postupak oduzimanja za rad.

Na osnovu člana 21., člana 22., člana 38. i člana 87. stav (3) Zakona o električnoj energiji u Federaciji Bosne i Hercegovine i člana 52. Pravilnika za izdavanje dozvola, odnosno u skladu sa tačkom 9. Dozvole za rad - licence za obavljanje elektroprivredne djelatnosti proizvodnje električne energije broj 06-03-730/31/12 od 18.12.2012. godine u prostorijama JP „Elektroprivreda HZ HB“ d.d. Mostar, dana 15.12.2015. godine Komisija za nadgledanje obavljanja licenciranih djelatnosti imenovana Rješenjem FERK-a broj 05-08-422-05/15 od 11.06.2015. godine izvršila je nadgledanje obavljanja djelatnosti proizvodnje električne energije. Tokom nadgledanja, navedena komisija je utvrdila da ne postoje tehnički uslovi prikupljanja podataka sa mjernih tačaka proizvodnih objekata priključenih na mrežu Elektroprenosa BiH, te direktnog preuzimanje podataka od strane NOSBiH-a. Imalac dozvole je upoznao komisiju o pokrenutim aktivnostima na iznalaženju prelaznog rješenja do uspostavljanja funkcionalnog sistema daljinskog očitavanja mjernih mjesta proizvodnih objekata priključenih na mrežu Elektroprenosa BiH.

O izvršenom nadgledanju, komisija je sačinila Izvještaj o obavljenom regulatornom nadgledanju, koje je dostavljeno imaocu dozvole na davanje komentara pod brojem 06-03-1040-01/15 dana 16.12.2015. godine.

Imalac dozvole je 17.12.2015. godine u FERK pod brojem 06-03-1040-02/15 dostavio „Operativni plan realizacije ručnog intervalnog prikupljanja podataka sa mjernih tačaka proizvodnih objekata JP „Elektroprivreda HZ HB“ d.d. Mostar priključenih na mrežu Elektroprenosa BiH“, u kojem je naveden način intervalnog prikupljanja podataka do uspostavljanja prelazne varijante prikupljanja podataka putem postojećeg sistema daljinskog očitavanja mjernih mjesta u distributivnoj mreži.

FERK je na XXIII redovnoj sjednici održanoj 18.12.2015. godine analizirao Izvještaj o obavljenom regulatornom nadgledanju, kao i dostavljene komentare imaoca dozvola, od kojih je neke komentare nakon pažljivog razmatranja usvojio, a za neke je ocijenio da isti nisu opravdani, a sve u skladu sa svojim pravilima i propisima i uslovima dozvole za rad.

FERK je utvrdio da je potrebno imaću dozvole naložiti poduzimanje mjera, navedenih u dispozitivu ovog rješenja, da bi se otklonile sve učinjene povrede izdate dozvole za rad, i to bez odlaganja.

Postupanje imaću dozvole po naloženim mjerama je naročito važno iz razloga što FERK ima mogućnost postupati u skladu sa članom 21. i članom 108. Zakona o električnoj energiji u Federaciji Bosne i Hercegovine, odnosno članom 53. Pravilnika za izdavanje dozvola, a slijedeći navedeno i u skladu sa tačkom 11. izdate dozvole za rad – licence.

Na osnovu naprijed navedenog, odlučeno je kao u dispozitivu ovog rješenja.

POUKA O PRAVNOM LIJEKU:

Protiv ovog rješenja imenovani može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana primitka rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

PREDSJEDNICA FERK-a
Sanela Pokrajčić